

Laxlawz Gou Hix Gig Ak Bw

原来我挺厉害的

Gou gaenq dwg siujhagseng ngeih nienzgaep lo, vanzlij dwg lwgsai dem, hoeng baez youq ciengzhab vunz lai hawj gou gangj vah, gou couh miz di lau. Neix lumjdwg boux lwgsai mbouj wnggai miz cungj biujyienh neix ha.

Hagdangz yaek gawjbanh gangj gojgaeq doxdax, moix ban senj sam boux hagseng camgya, aiq dwg aenvih gou mbeiiq, lauxsae siengj lienhlienhou, gingqyienz senj gou bae camgya. Gou gawq angq youh lau. Angq dwg gou ndaej leihyungh baez gihvei neix lienhlienhou mbei gou; lau dwg danghnaeuz gou biujyienh mbouj ndei aiq hawj ban gou doeknaj, hawj swheij doeknaj. Daj lauxsae lwnh gou seizde hwnj itcig daengz cuengqhag ma ranz, ndawsim gou cungj siengj gienh saeh neix. Mwh cuengqhag, gou gingqyienz lumz daehsaw youq ndaw gyausiz,

mbouj aemq ma ranz lo. Vunz ndaw ranz cawzliux daxboh cungj riu gou, daxboh haenh gou dwg boux vunz guh saeh nyinhcaen ndeu, gaenjcieng gangmingz gou yawjnaek baez gangj gojgaeq doxdax neix, daxboh heuh gou ndeindei cinjbi.

Haemhde, gou couh hainduj boih gojgaeq 《Gu Yenzvuj Gyaez Hag》 lauxsae bang gou senj haenx.

.....
“Boux baihlaj gangj gojgaeq haenx dwg ngeih nienzgaep it ban Yez Swjgyah!” Dingqnyi bouxcujciz heuh coh gou, gou gaenjcieng ndaej cungj mbouj rox swheij dwg baenzlawz hwnj daiz bae. Gou roxnyinh swheij ndwn youq gwnz daiz, ga itcig saenz, gou roengzrengz ngiengx gyaeuj hwnj, naeuz: “Daihgya ndei, gou dwg ngeih nienzgaep it ban Yez Swjgyah, ngoenzneix gou gangj aen

gojgaeq hawj daihgya haenx dwg 《Gu Yenzvuj Gyaez Hag》.....

Gou gangj sat le, doeksaet dwk dingqnyi laj daiz bekwngz goksasa. Ma daengz laj daiz, banhcujyin caeuq daxmeh cungj haenh gou gig ak. Aen sim diuqbubbub gou cij dingh roengzdaeuj.

Doeklaeng, daxmeh hawj gou yawj sibinz ndaw soujgih de, gou raen swheij hauilai dungcoz cungj lumz guh lo, vanzlij gangj ndaej miz di vaiq, aenvih mwhde gou saedcaih gaenjcieng lai lo.

Gvaq geij ngoenz, hagdangz gunghbu mingzdan ndaej ciengj, gou gingqyienz ndaej cuj nienzgaep it daengjciengj, seizde gou gag siengj: “Laxlawz gou hix gig ak bw!”

(Liuzningz Danhdungh Si Gvanhden Cin Cunghsinh Siujyoz ngeih nienzgaep Yez Swjgyah)



Loq Maxloeghozraez

长颈鹿的梦

Doenghbaez, youq gwnz diegnywj heuyau, miz duz maxloeghozraez siengjap mbouj doengz ndeu. Lwgda de hungyat luenzlu, aen hoz raezrangh, geu buh raiz de gig ndeiawj, mbouj miz vunz doengz, hoeng maxloeghozraez ngoenzngoenz ienq aen hoz de raez lai, siengj aeu aen hoz dinj ndeu. Neix dwg vih gijmaz ne?

Laxlawz maxloeghozraez gingciengz caeuq doengzdohi guhcaemz, hoeng mbouj miz vunz gyaez caeuq de guhcaemz. Aenvih aen hoz de saedcaih raez lai lo, bae ranz bouxlawz cungj gyongz byoengq dingj ranz bouxde aen congh hung ndeu.

Maxloeghozraez mbouj miz baengzyoux, de gig siengsim, de seizseiz cungj siengj: Swheij danghnaeuz miz aen hoz dinj ndeu geijlai ndei ha! Siengj ha siengj ha, mbouj rox seizlawz couh ninz ndaek lo, sawqmwh de lumjbaenz daeujdaengz lingh aen biengz ndeu, de raen aen hoz de bienq dinj lo, de angq dangqmaz.

De guhcaemz guh dwk guh dwk, de youh naet youh iek, couh siengj bae gwn doxgaiq, hoeng mbawfaex sang lai, de gwn mbouj daengz, de iek ndaej aen dungx hemq “gugu”, couh yienghneix, maxloeghozraez iek ndaej sam ngoenz sam hwnz, yienghneix de baenz bingh lo.

Bingh ndei le de cij rox, mbouj bietdingh vihliux hawj vunz gyaez bae gaijbienq swheij, de aeu aen hozraez de hawj doenghduz iq guh aen laerod, daihgya ciuq-yiengh guhcaemz ndaej angq dangqmaz! Geu ndit ndeu ciuq aen da de, de ndiu lo, laxlawz neix dwg ciengz loq ndeu ha!

(Suhcouh Si Cwngzda Sizyen Siujyoz Liuz Fanghyiz)



Ci Ranz Gou

我家的车

Dingq daxgoeng gangj, 20 sigij 70 nienzdaih co, vunzlai okdou dingzlai cungj dwg baengh din byaij loh, gawq sai rengz youh sai seizgan. Seizde, danci caeuq aencibuh, soujbiuj caez heuhguh “sam daih gienh”, diegvih de couh lumj ciq seizneix nei. Danghnaeuz ranz lawz miz gyaq danci moq ndeu, couh lumj ndaejdaengz yiengh doxgaiq dijbauj citgeiz ndeu, hawj vunz hozhaenz dangqmaz.

70 nienzdaih mued, vihliux ciepsongq daxboh youq yienhsingz hwnj gauhcungh haenx, daxgoeng haenqsim dawz ok gij cienz rom ndaej geij bi haenx, cawx gyaq danci ndeu. Danci gwih ma ranz, daengx ranz vunz gikdoengh dwk yawj le youh yawj, lumh le youh lumh. Daxboh naeuz, mwh baehag gwih danci, couh lumj vunz ciuhgeq naengh aengiu h vunz ram nei, miznaj dangqmaz. Gyaq danci haenx buenx daxboh doeg sat gauhcungh, youh buenx mehguh daengz gauhcungh bizyez.

Daengz le 80 nienzdaih, vunzlai youh gyaez hwnj cimozdoz. Gwih

cimozdoz hai gvaq gwnz gai geh hongh, yinx daeuj hauilai vunz cimyawj. Daxboh youq yienhsingz hwnjban, liz ranz haemq gyae. Vihliux baedauq hwnjban fuengbienh, daxboh mbaet gwn mbaet yungh, cawx ndaej gyaq cimozdoz ndeu. Couh yienghneix, cimozdoz couh baenz gyaqci daxboh hai bae danhvei caeuq ma ranz haenx lo.

Haeujdaengz 21 sigij, ciq hainduj haeuj ranz beksingq bingzciengz bae lo. Vihliux hawj daxgoeng daxbuz nienzlaux haenx okdou mbouj deng rumz ci fwn rwd, daxboh daxmeh doxyaeng cawx gyaq ciq ndeu. Youq mwh gou muengh bae muengh dauq haenx, daxboh hai gyaq ciq moq ndeu ma daengz ranz lo. Ngoenz yietnaiq, daxboh angqvauvau hai ci daiq daengx ranz vunz okbae youz. Daxgoeng doenghsim naeuz: “Caen dwg loq cungj mbouj siengj daengz, gou ciuh vunz neix lij ndaej naengh ciq ranz bonjfaenh ha.”

Daj byaij loh daengz danci, caiq daengz cimozdoz, cigdaengz ciq, lizsij gyauhdungh gunghgi bienqvaq neix, guhcingq le ranz gou gwndaenj bienqvaq. Dou cimz gvaq gwndaenj gungzhoj doenghbaez, hix cimz daengz gij vandiempz sevei fazcanj ngoenzneix.

(Hoznanz Neiyangh Yen Cwngz-gvanh Cin Daih' it Siujyoz Maj Cinhcwngz)